

Për fat të keq, për këtë komunikim të rëndësishëm Ministria e Drejtësisë nuk është vënë në dijeni, edhe pse është vlerësuar si një nga aktorët e rëndësishëm në implementimin e Reformës në Sistemin e Drejtësisë.

Nga shqyrtimi i komunikimit të sipërcituar të datës 7 shkurt 2017, linden shqetësime të rëndësishme lidhur me komunikimet zyrtare të mbajtura, dhe ligjshmërinë e procesit të ndërtimit dhe funksionimit të asaj pjese të Operacionit Ndërkombëtar të Monitorimit, që sipas dokumenteve të sipërcituara, është quajtur Bord i Menaxhimit të Operacionit Ndërkombëtar të Monitorimit.

Më lejoni t'ju risjell në vëmendje se konsensusi politik i arritur, që bëri të mundur ndryshimet kushtetuese në 21-22 Korrik 2016, kishte në frymën e tij, përcaktimin saktësisht, qoftë në aneksin e Kushtetutës, apo dhe në ligjin nr. 84/2016 "Për rivlerësimin kalimtar të gjyqtarëve dhe prokurorëve në Republikën e Shqipërisë", që procesi i rivlerësimit kalimtar do të mbështetej nëpërmjet monitorimit e mbikëqyrjes, përmes vëzhguesve ndërkombëtarë, të cilët do të duhet të ishin ekspertë të ligjit.

Ky vullnet konsensual është shprehur qartësisht në Kushtetutën e vendit, ku citohet se : *Vëzhguesit emërohen nga radhët e gjyqtarëve ose prokurorëve me jo më pak se 15 vjet eksperiencë në sistemin e drejtësisë së vendeve të tyre përkatëse.*

Në të gjitha dispozitat, qoftë kushtetuese apo ligjore, nuk ka asnjë përcaktim mbi ngritjen e një Bordi të Menaxhimit të ONM-së.

Në komunikimin e datës 7 Shkurt 2017, janë caktuar 3 (tre) ekspertë të vendeve anëtare të Bashkimit Europian dhe 2 (dy) ekspertë të Shteteve të Bashkuara të Amerikës.

Caktimi i këtyre ekspertëve është në respektim të plotë të kërkesave të Kushtetutës dhe ligjit, sa i takon procesit të rivlerësimit kalimtar të gjyqtarëve dhe të prokurorëve, pasi këta do të jenë organi i ngarkuar që do të realizojnë vëzhgimin e pavarur të të gjithë procesit.

Ndërkohë që Qeveria shqiptare ka detyrimin të vërë në dispozicion të tyre gjithçka, duke filluar nga informacioni i plote ligjor e dokumentar, deri në garantimin e mjeteve logjistike.

Ndërsa më lejoni të evidentoj se, çdo parashikim tjetër sa i takon Bordit të Menaxhimit të Operacionit Ndërkombëtar të Monitorimit, përbërjes, rolit të tij të paqartë në këtë proces, anëtarësisë së tij me pjesëmarrës të përhershëm dhe të përkohshëm, si dhe përfshirja brenda tij të

përfaqësuesve të ambasadave respektive, nuk gjejnë mbështetje qoftë në Kushtetutë, apo dhe në ligj.

Gjithashtu, është rasti për T'ju rikujtuar që fryma e Kushtetutës dhe e ligjit, sa i takon rolit dhe përbërjes së Operacionit Ndërkombëtar të Monitorimit ishte tërheqja e ekspertizës më të mirë, më të besueshme, profesionale dhe teknike, që do të mund të garantojë integritetin dhe paanshmërinë e rivlerësimit kalimtar, dhe jo përfshirjen në proces të trupave/personave me përbërje politike, siç është Bordi i Operacionit Ndërkombëtar të Monitorimit, si *interlokutor* midis ekspertëve të Operacionit Ndërkombëtar të Monitorimit dhe autoriteteve shqiptare.

Për sa sa më sipër, do të propozoja kthimin në rrugën e kushtetutshmërisë dhe ligjit të kësaj çështjeje, me qëllim diskutimin e problematikës së lindur me krijimin e këtij Bordi.

Ky diskutim duhet të jetë pjesë e tryezave të nivelit të lartë politik dhe parlamentar. Vetëm pas këtij diskutimi dhe vendimmarrjes pasuese mbi të, do të mund të vijohej më pas, me procesin e nisur tashmë.

Ministria e Drejtësisë gjen rastin edhe një herë të shprehë angazhimin maksimal për mbështetjen e këtij procesi, në funksion të konstituimit dhe bërjes funksionale të të gjithë mekanizmit për realizimin e rivlerësimit kalimtar të të gjithë trupës së sistemit të drejtësisë shqiptare.

Duke ju falënderuar për vëmendjen,

MINISTRI
PETRIT VASILI

The image shows a blue circular official stamp of the Ministry of Justice of the Republic of Albania. The text around the perimeter of the stamp reads "REPUBLIKA E SHQIPERISE" at the top and "MINISTRIA E DREJTËSISË" at the bottom. In the center of the stamp is a smaller emblem. Overlaid on the stamp is a handwritten signature in blue ink, which appears to be "P. Vasili".